

# BUSINÀ 88°

2012/2013

(Bellinaso Fabio – Raiteri Pier Luigi)

Buna sira, buna sira cari siuri e ben c'mè c'la va?

Im smeji 'n pò' sagrinà; per forza, i j'ei pagà ònche voi l'IMU? Me a l'hó nént pagàja, perchè prùma a j'ava senti che i Maya i j'avu dicc che al 21 dicember al finiva el mond. Pó' a j'hó alsì che ònche Brunetta ui la fava nént a paghela, c'l'a duì ciamè i sold an bònca, am son dicc: " E me se c'a son, el pù ciula?". La quistion a l'è stacia che la scadensa dl'IMU a l'era u 17 e l'ater dì u m'è sübit rivàja la cartèla da Equitalia, e u j'era scricc: "Gelindo, fa nénta u dritu e va a paghè sgià, che la fen del mond i l'hòn rinviàja!"

Cula fen che anveci u j'è tucà ist ani a in noster amis, Giovanni Gatti. Chi dai frà il ciamavu tücc 'micio', perchè u l'andava a rampgnèsi an s'la raminà del Moccagatta quòndi c'l'andava a vighi i Grigi. Per tòncc ani a l'ha druèrt e sarà u sipario ad Gelindo, e, se a l'era ad duminica, magari u sentiva la radiuleina col partei; e se i grigi i favu gol, u sipario magari us drubiva nénta. Adès u sipario u s'è sarà an s'la to vita, ma noi a t'a smentieruma mai...Ciao, ciao Giuani!

Va ben là, c'mensipiuma nént col ròbi brüti. Pensuma anveci che ist'ani i son utantòt, utantòt ani c'a fuma la Divòta Cumedia; a suma quasi c'mé na 'telenovela', iv na visi ad Dallas e Dynasty? A l'è che adès ònche a Lisòndria a puduma fè la nostra telenovela, u titul u j'è zà: 'Quòndi ch'i finirròn el ponte Meier?'. Um ven fin da reji, perchè a l'è trei ani c'av digh el medesim ròbi.

Trei ani fa, i j'avu sbaglià el prugèt; a l'era tròp long, u c'mensàva an Via Dossena e u rivàva fin an Sitadéla. Doi ani fa, i j'avu büta sü in cartèl gròs c'mè na cà: 'Ponte Meier. Il ponte che unisce'. Pó', dòp trei meis, i l'hòn gavà per бүтèni in ater in pò' pù cit: 'Guarda oltre', per forza, an mes u j'era gnen-te. L'ani pasà, jèn ancur pù cit, grònd c'mé 'n francubul: 'Si parte!...'; me a aurisa savei andò ch'i son andacc?!

Pó' i j'hòn бүтà zü la prùma preja; ist'ani però i j'hòn ancora facc niente: us vigh che i stòn ancora serçònda la sgònda! Ma s'im ciamavu, ai la diva me andò chi l'hòn бүтaja: an s'la rutonda d'adnòn a l'AMAG! Me a digh che, s'a anduma d'is pas chi, forse forse el pont a l'era mej fèli con i LEGO: i custu pù pòc e 't pudivi fèli e trèli zü in mügg ad vòti, acsé la telenovela la pó' andè avònti chisà quònc ani!

Mah! I disu che me am lamént semper: a l'è nént veira. Per esempi, i j'ei vist che i j'hòn facc Lisòndria pù bèla, i j'hòn бүтà l'iluminasion cui Led e i j'hòn slargà el parchegio ad Via Parma. I j'hòn rangià tüt el strà, bèh, quasi tütì, i j'hòn lasà andrera ammachi Via Sòn Fransesc; sé, perchè u Sendich u sta spi-

ciònda se c'a digh me ant la businà ist ani: s'a fas el brav, um la ròngia, se 'd no, u la lasa tûta c'mé c'l'è. Ma i j'ei vist? Chi dadnòn u j'è ancur di bogg c'u smeja ad fè el 'Càmel Trophy', tònt che per scansè i bogg e i palèt a 't devi guidè c'mé Gustav Thoeni o c'mé Tomba!

Se ch'i vóri c'av diga, na vòta a j'avu ammàch el strà disestaji, adès el dissesto a l'è rivà ònche an Cumèn, perchè i cundòs cul proverbi c'u dis 'Anno bise-sto, anno funesto'; noi a Lisòndria a l'uma cambià: "anno bise-sto, anno dis-sesto!". Però, avej pasiensa, se ch'i j'avrivi pretendi: c'mé c'us ciama el munisipi a Lisòndria? Palazzo Rosso, e c'mé c'as ciama u Sendich nov? Rita Rossa, e anlura cun na Rusa a Palasi Rus, c'mé ch'i vóri c'u seja el chënt an bònca? An rus!

Però, per furteina, per rangè la quistion, da Ruma i j'hòn mandà chi doi Cumisari e in Ispetur; a l'è per su lè che voi an television i vighi pù pòc, perchè ch'i son tücc chi a Lisòndria: l'Ispe-tore us ciama Derrick e pó' u j'è el Cumisari Basettoni e el Cumisari Rex. Speruma che, tra tücc, prùma ad turnè an television, im gavu dai pastis! Che dusesesedes milion ad pastis i son tònc da bon!

Ormai ad sold u na j'è semp pù pòc, acsé chi a Lisòndria i travaj i vòn avònti semp pù piòn. Me a digh che i noster pulitich i j'avreisu d'absogn ad piè l'esempio dalla Valeria Straneo c'a l'ha purtà u nòm ad Lisòndria an gir per tüt el mond. I j'ei vist me c'l'a curiva 'st'istà! E noi adès aj fuma in bèl aplauso...

A me um smeja che i pulitich, anveci, i son ammach bon a curi quòndi c'us trata ad cambiè el partì. Cul là, che fin a doi ani fa, a l'era ansèma a la sni-stra, pó' a l'è andacc au centro, dòp u s'è spustà in pò' pù a dricia: acsé adès, se 't al tróvi pù, 't póri stè sicür c'a l'è finì ant el Gruppo Misto.

Pó' u j'è Di Pietro, c'u sta pensònda s'al dev bitèsi ansèma a Grillo, c'a j'avu d'absogn ònche ad lü! In comic an mèa a dla gent c'a l'è quarònt'ani c'l'a fa sciupè da u rej! E an mèa a cui ch'i fòn rej, ui n'a j'è ònche ad cui ch'i gratu. Però u j'è da dì in afari: dòp ch'i j'hòn gratà e ch'i j'hòn ciapà col mònt ant la ciculata, i ciamu scüsa, acsé, anveci d'andè an gavadouna, i vòn a pentisi an cunvent. A prupòsit, s'ì vighi in frà bèl gras c'u gira an Cunvent, a l'è nénta in frà, a l'è Fiorito!

A l'è che, an bèl mument, per fèm pù rej adrera, i j'hòn duì ciamè Monti, lü e i so profesur; e sé, perchè per aumentè la bensina, aumentè l'IVA, fè del tasi novi c'mé l'IMU, tajè el pension a cui ch'i ciapu niénte, e tajè el speisi per la Sanità, uj auvriva pròpi di profesur! A l'è che 'sti profesur i j'eru tròp stüdià e i parlavu ant na manera che 't favi fin fadeja a capì se ch'i divu. Acsé, per capì se c'l'a diva la Fornero, a j'hó duvì anvischè l' 'IPad', andè ansüma a 'twitter', e le la diva che me a j'era 'choosy', che el 'rating' el calava, u 'spread' a l'era al steili, e che s'a fàvu nénta in pò' ad 'spending review', u j'era el 'default'.

Me a j'ava capì gnente, ma a j'hó ciamà a in me amìs istruì, c'u travaja ant el mond 'd la scòla, sé, al fa el bidèl a la Carducci, e um ha dicc che i j'hòn facc tücc is gir ad paroli per di... c'a suma ant la nìta fin a j'ogg!

A propòsit 'd la scola: con 'sta crisi c'u j'è, a to fiò, quòndi ch'el va a scola, at devi dèj adrera tüt. Pensè che a scola i j'hòn gnònc pü i sòld per crumpè la carta igienica. I j'hòn dicc ch'i n'hòn pü meja, perchè i j'hòn büta dapertüt la lavagna digitale: el vò di che 'sti fanciòt, quòndi ch'i vòn au cèsu, is farròn pulid cun u "digitale"!

Però ades ònche Monti u j'è pü e a suma turna pront per entrè ant la mischia d'j'esion. Al Partì Demucratic, i son partì per prüm col Primari, u smjava d'esi an America. Bersani a l'ha guadagnà e Renzi a l'ha perdì. Iv na visi che, quòndi c'a l'era amni chi a Lisòndria, a l'auriva rutamè ònche Gelindo (*riferimento a vignetta sul giornale 'Voce Alessandrina' n.d.r.*), perchè a l'ava poura c'am candideisa ònche me. A l'ha perdì el primari, ma dato c'a l'è in esperto ad rutamasiòn, u sta sercònda u travaj a la FIAT!

E antònt che el PD al fàva el Primari, Berlusconi a l'è andacc an Kenya da u so amis Briatore a fè 'n pò' ad Lifting: u sé facc tirè 'n po' la pèl, ui j'hòn lüstrà i cavì, smeriglià la dentiéra e acsé adès a l'è pront per 'Scendere in Campo' in'atra vota. Sé, ma se ch'i j'ei capì, nénta ammachi an pulitica, ònche a San Siro al post 'd Robinho!

Perchè lü a l'è furtünà, el pó sèrni andó andè a fès cürè. Noi, pover diau, u'm tuca andè ant i uspidal e spiciè ses o set meis, o rangèsi cun cui pòc sòld c'a j'uma an sacocia. Uv pó capitè c'mé a cul me amis c'u s'era tajà na mònt tont c'u travajava. I j'hòn sübit ciamà l'ambulònsa, i l'hòn purtà ant na Clinica specialisaja e um cüntava: «"Me na clinica bèla acsé a l'hó mai vista. U j'era tüt el parquet ad ligna, lampadari 'd cristal, aria cundisiunaja, tücc i televisur al 'plasma', infermeri óuti, biondi ch'i smjavu del 'miss'; per nént parlè du dutur out, magher, tüt abrusà c'u smjava n'atur! U m'ha vist e u m'ha dicc 'per fè s'intervent, ad prublema ui na j'è meja. L'ünic afari a l'è la speisa: i son tròntamila euro' ". E me a j'hó dicc: "Dutur, me a pos nénta spendi si sòld, a ciap mila euro al meis: c'mé c'a fasa? U sa meja s'u j'è in'atra clinica da spendi menu?". "Sé – u m'ha rispundì – chi d'ausen ui na j'è jëina cunvensiunaja cun la mutua". Acsé a son andacc. 'T eisi vist! El pianéli ch'is stacavu, al pòst di lampadari u j'era du lampadèini c'u smjava d'esi au simiteri, in ventilatur tüt sciapà, televisur an biònc e neier, infermeri citi, grasi, brüti. U dutur a l'ava in camice c'u smjava in maslè. U m'ha visità e u m'ha dicc che 'd prublema ui na j'era meja e la speisa a l'era mila euro. Me a j'hó sübilt acetà e a j'hó facc l'intervent. Finì, u m'ha dicc che dòp ot di um avreisa gavà el bendi e a pudiva andè a cà! Pasà na smòuna, a l'è rivà u dutur; u m'ha gavà el bendi e u m'ha facc bugiè sübit la mònt. A me um smjava n'afari ad bugièl turna la mònt e tücc i di! "A l'è couda, us vigh che la circolasion la funsiouna; ònche la ferita a l'è

bèla, us vigh nénta" u dis u dutur. "Ch'el uarda, dutur, me a so nént c'mé ringrasièli; cun mila euro a l'hó rangiaja e da là i n'aurivu trentamila: *toh!* (*gesto dell'ombrello n.d.r.*). UUh, la me mò!!» (*la mano si distacca e cade a terra n.d.r.*).

Adès auriva salütè el Vescuv nov, c'l'è el pü giuvu d'Italia (Mons. Guido Gallese) e ringrasiè el Card. Versaldi per tüt cul c'l'ha facc per Lisòndria. A tücc e doi ai fuma j'augüri ch'i posu travajè an serenità!

Adès a la piònt lè, se 'd no, la ven longa e av present la mè famija...